

Yudi saba kaplāņ

Syaha fla

¹ Yii mpāy, Yāhā ye yāņ yi, ye ntāņ dye wo Tuhufua Yāhā tāy. Ke n sēņ ye na, ma ye ta ye n kuee yai tāņ Yesu Crise myaha na. Ndoos Yudi kē tē saba nwo yrūhū nō wāā ye ye. N ma Syake cīfua, ma maha ma Yesu Crise tēntēle.
² Yāhā ke ye fēn di, ke yrīņ wāā ye kē, ye ntāņ ke dye ke tāy. Yāhā ke kaa taha koo ngī wāpyeņ na ye kē.

Mpāy ma pe Yāhā kaplāņ wā klaha n le kawar wo (Pyar syāņ wuhu 2.1-17)

³ Ta naambiyām, saba nwo laam wo, n sroņ naa n kē ndoo ga wo wāsyayaha wī yrūhū le u laam wo, Yāhā ke wo sya yaha mii syi dyaņ tesē wo sukūhū wāyāā wī ne. Kur ye, ta n yāā le puar, n loo nde ta yaha, n ye yar nde ne: Tee yii waha, ma Yesu Crise ta ye Yatēr mii, ye naa loo cīinde wī yāņ, kawar wūhū nkāy ma n wlāhā le wo ye! ⁴ Ye sē yāā, napī- mpāy ma pe pay dye wo nsoho wo, wo sē cā ye. Ye sē yāā, Yāhā kapān lii le Yāhā laantār wī pāā, poo le wā klaha ta, ma nii pe ya paha le ne pe tyatyāhā wāpye kānde wo. Pe pyer nde le ta, nawee- n cā pe Yesu Crise wī sye, woo wii u ma wo klahafua, ma maha ma wo Yīņfua. Le -sē ma le yrūhū ta nii Yāhā sabangbāņ wo ma yee, Yāhā kasāhā too wa pe na. Le yrūhūyale dey.

⁵ Yīņfua Yāhā ke bii koho le Yiisrēfa ye mii syi dyaņ pe n waha fā yi Syipte klo wo, faale cāā na, ye le cā. Kur ye, mpāy pe bii sye, pe sē Yāhā ta pe Yatēr ye, Yīņfua Yāhā ke poo mii boo mii syi dyaņ, ye maha le cā. Tee yāā, n nii ke pāā ye ye, n n traha n ye laam too ke na. ⁶ Ye sē maha

sāndāã mii wĩ yāã la? Yāhā ke pe taha yĩŋ gii na pe n yee ke kloŋ tɛr poo na, ma pe niisaha sye, Yāhā poo sāndāpee mii yigi pua yaha, wam teepee laa wo, wāsāhāyahayāã wee pe na ye. Pe n nii ke kasāhā per sēŋ. ⁷ Ye sē maha faale Sodōfa wĩ yāã la Gumorfa ne, ma suhu pe kānkāy kuifa bya wĩ ne. Pe pe ya le tyatyāhā wāpyeŋ gaa syi wo, le saa waha pāã ye. Yāhā n naa gaa ta ke n tege too pe na, ma pe suhu tāŋ. Poo wĩ nde nii kayar mpāy ye, pe n pye pe wāŋ syi dyaŋ. Naa gii wāfegeyāã wee ke na ye, ke ma ke pe sēŋ yaha.

⁸ Ta n ye yar, nawee- mii pe Yāhā kaplāŋ yĩntaha figi n le kawar wo, pe kapee- wāpyeŋ ma wācɛŋ mpāy wĩ ne too pāã tɛr. Pe kai- nkāy wũ ga n ta pe laam wātaŋ, koo kai- ngĩ kē ke pe le tyatyāhā wāpyeŋ wo kapee- nkāy ne. Pe pe ya ta, poo saa waa yor luhu ye. Pe maha yāhāyĩŋ naweeyōm gɛ tyɛhɛ. ⁹ Yāhāyĩŋ tēnlɛhɛ yĩŋfua wii gɛ pe n yee Minsyɛl, woo nwo gɛ sē n sya, ma sāndāpee yĩŋfua Setane tyɛhɛ ye. Yēcroho ke sya bii dye pe nsoho wo u sāndāpee yĩŋfua ne faale wādyaha Musa nakugu wĩ na, u sāndāpee yĩŋfua pye kapān ya ne ma yee: «Yāhā ke ma pēn!» ¹⁰ Poo nawee- mii poo na, ngii pe sē cā war yĩnde ne ye, koo pe n tyɛhɛ. Kai- nkāy ke wĩ ma pe na, pe ke pye mii wlaaha wān dyaŋ, laam kacān gɛ wee car gɛ pe ye ye. Koo ke -sē ga pe wĩ kua. ¹¹ Kapee ga pe gbe! Faalefa Kayē tuu pye kānde lii wo, loo ne pe gbe. Wale wāyāã wĩ pe ta pe n maha tee n pye faalefa Balaam wāŋ syi dyaŋ. Pe jar, ma sye, poo saa pe yĩŋfua kaplāŋ luhu ye mii faalefa Kore wāŋ syi dyaŋ. Loo nde ga ba pe wĩ kua.

¹² Yii mpāy tee ma yii ne Yesu kānde wo, ye ma nanihi dir soho, poo mii ter ma pe yē le ye ne, loo nde ne nii mii faafĩ dyaŋ teewole ne le na. Pe ga nii ye telai wo, pe naa nuhu di, pe naa pe ya laam wũhũ ya pye, pe saa kur naa n syihi laa gɛ na ye. Pe ma mii sesaha gii syi dyaŋ ke ma ne

wɔ, teflaha n ke gbe tɛr, ke saa yãã pa ye. Pe ma mii katyir rii syi dyaŋ, te sacãã ma nɔ, te saa sa ye; ma maha ma mii katyir rii syi dyaŋ te kuã cãär, ma waha. ¹³ Poo nawee- mii ma mii lagblaha dyaŋ teflaha ke ke gblaha. Pe pyer ma mii ke lagblaha gbühüfir rii syi dyaŋ te nayän yigi, ke loho n tege tɛr, te wor n kuee ke fla na. Pe maha ma mii yrompii mpây dyaŋ pe ka n tay, kakuɛ wee pe na ye. Yãhã teepee laa gbihi ta yaha pe myaha na, wam fla ya.

¹⁴ Yɛnoke tuhufuadyaha tuhufuadyaha tuhufuadyaha bii kě Dama ne. Faale cãã na, woo Yɛnoke kě tuu bii le cãã pãã yaha poosyifa wĩ na ma yee: «-Ye yãŋ! U Yĩŋfua ga ba pa u yãhãyĩŋ tẽnlɛhɛ ye ne, kacãn saa ba pye pe wãnihi na ye. ¹⁵ Pe ga ba nawee- byɛ sãhã. Naweepee- mpây byɛ pe yee poo jar, ma Yãhã kãnde miy yaha ma nii kapee- pye, ma maha nii kaplãmpee- pãã n wãã Yãhã kě, Yãhã ga ba koo kapee- ngĩ byɛ yar pe na gbaa na, pe n ke yãã pe waha cã pe pẽn lii na.» ¹⁶ Poofa mii, yalebyɛ pe laanyar pe ta pe n nii n kuãn. Kai- nkãy ke n tãy pe ye, koo ya pyelaam ke ma pe na. Yataŋ kaplãŋ ya pe n pãã. Pe maha nawee wlaŋ kaplãntãhã ne ma war sya.

Yesu kãndeyãrfa yai pe naa pe ya yigi

¹⁷ Ta naambiyãm, yii poo na, ye tyii ye laam n too ke kaplãŋ na, kaplãŋ nkãy wo Yĩŋfua Yesu Crise tẽnlɛhɛ ba cãã ke tõr yaha. ¹⁸ Pe sã ba ye pye la ma yee: «Driyẽ kuayale wo, nawee- mpây ter ga ba naa ye lɛr. Pe ga ba naa pe troho tãhã pe laam kapee- yor wo.» ¹⁹ Poo me, pe ga ba Yesu kãndeyãrfa gblaha, pe n dur yi pe ya kur ye. Yãhã Yrã gɛ wee pe laam wo ye, lii le gboho pe laam wo, loo ya pe ga ba naa n pye. ²⁰ Yii poo na, ta naambiyãm, tee Yesu wĩ sya cĩinde, loo kayĩ nde ma gbɛgbɛ kai- byɛ na. -Ye loo ta, ye naa fãnga le yii laam wo yalebyɛ. Yãhã Yrã le ye yar le ne mii, ye naa Yãhã nar koo syi. ²¹ -Ye naa yii

laam too yalebyε, ye ntāṅ wādye wīī ne Yāhā tāy. -Tee tyii ye bya ntāṅ naa n dye yii tāy koo syi dyaṅ, koo per nge n ba nɔ, per gii wo Yīṅfua Yesu u ta ma n pai u laantār yar ye na, ye n kuee yai tāṅ yrāṅ na u ne.

²² Mpāy pe laalaa pye Yesu wāta wīī ne pe Yatεr, -ye naa kayīī pye pe kē, ye pe ta pe n le sya pe Yesu ta pe Yatεr cīinde. ²³ Ye ma waha loo pye pe kē, ye pe sya yaha. Ye maha pe tyīn yi kāā naa wo. Mpāy ter maha ma, -ye naa poo bya fεn di, -tee -sē yii yigi pe ne, pe ma n ba ye le pe kapee- wāpyeṅ wo ye. Pe laam kapee- ma mii nayroho dyaṅ ke wɔ degedege wor ne. Ke syi sē yai ye tε gε tε ke na, ye ke wor raa mar gbe ye.

Kaplāṅ kuasaha fla tesē Yāhā wāsey ne

²⁴ Yāhā koo kē ke ga waha sēṅ ye na, ye ma n ka kapee- wāpye koho kuε ye ye. Koo maha kē ke ga waha ba ye ta ye n nii gbεgbε, per gii tee n pai pye ke ne nayōr fla wo. Koo per, ye laam ga ba pye nuhu fla. ²⁵ Koo ya kē ke ma Yāhā, ke ga waha wo sya yaha wo Yīṅfua Yesu Crise kāmay na. Nayōr ma Yāhā ya wān, koo ya myaha ke gboho, fānga ma koo ya ye, koo ya ke ma niisar byε yīṅ na. Ke pye lε nii wa ke syi, ma sya ba waa nanga na. Ke ga kuee yai tāṅ ke syi! Amεn, le nii ke syi.

YĀHĀ NAAMBIYĀRFĀN SABA

Karaboro, Eastern: YĀHĀ NAAMBIYĀRFĀN SABA New Testament
copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 13 Jun
2022

15120496-00e2-503a-8d40-2d7cfdc1ba5b